

易

通

易學要論卷下

易通二

上元程廷祚著

論彖爻繫辭之例

例者以類相從之謂。作易者無例也。然成書之後。則可以例觀。而學者比例以求其義。亦復易明。故繫辭之例。不可以不論。

彖者卦之全體。猶人之有身也。爻則各分一體。猶身之有耳目手足也。身之用全。而四體之用偏。傳曰。彖者言乎象。言彖辭統論一卦之大意也。爻者言

乎變言爻辭乃言時位所值之吉凶也。象爻之體其不同者如此。然彖辭雖統論一卦而時位之得失亦畧具焉。故曰智者觀其彖辭則思過半矣。爻辭多有一二與彖不合者變之所至不得不然也。如屯彖言勿用有攸往而六四乃言往吉比彖言不寧方來而六三乃言比之匪人履彖言履虎尾不啞人亨而六三乃言履虎尾而啞人同人以同人爲義而九三乃言伏戎于莽噬嗑以用刑爲義而初上乃言受刑之人剝以剝陽爲義而六三則

言自剝六五則言奉陽恒象言无咎利貞利有攸
往而六爻无甚利之辭震象言亨而爻自初九而
外皆未見其亨艮象言无咎而二與三皆不能无
咎歸妹之象言征凶无攸利而初二與五皆吉利
小過之象言飛鳥遺之音而初與上之飛鳥皆凶
如此類者甚衆蓋象辭惟舉大義而時位之吉凶
悔吝非爻辭不足以盡之所謂不可爲典要唯變
所適也。

有象之所繫僅指卦中之一爻者如需光亨貞吉利

涉大川九五也師貞丈人吉九二也謙亨君子有終九三也豫利建侯行師九四也大過棟橈九三也明夷利艱貞六五也家人利女貞六二也姤女壯勿用取女初六也益之利有攸往利涉大川九五也震亨震來虩虩笑言啞啞初九也若此類者其爻本爲卦之所重故彖舉之已足然餘爻之離合當否又未嘗不可卽此而推

彖辭又有截然以兩言分指卦之二體者賁亨指上卦小利有攸往指下卦頤之觀頤指上卦自求口

實指下卦又有卦外起義者如臨之至于八月有凶此爻義之所无皆變例也

先儒以時言卦以位言爻不知卦主天下之事物爻則兼時與位而言傳曰彖者言乎象者也又曰彖者材也豈非卦主事物乎乾之傳曰六位時成豈非爻兼時與位乎儒者既專以位言爻故遂謂五爲君二爲臣四爲大臣上爲賓師以六爻爲六人咸依此以求爻義不知爻曰貴賤之等者爻德有貴有賤非以六爻爲六人而分貴賤也

天地間同此一事而時位不同故一卦之中六爻不能皆善聖人之意則欲人咸歸于善而後已如乾之潛見惕躍飛亢非有六人乃欲人以乾道行于此六爻之中也又如屯卦取義于君而爻則以初爲君道以五爲君位蒙卦取義于師而爻則以二爲師道以上爲師位蓋屯之五卽初蒙之上卽二也豈可曰屯有二君蒙有二師乎至他卦爻辭之例則有二端有于爻之中而設言其所爲之得失者有于爻之外而言人之值此當如是以處之

者。爻中之例學者之所易知。爻外之例若坤之六
四曰括囊无咎。言人處陰盛之時。當以閉藏爲宜。
而非謂六四能括囊也。屯之初九曰利建侯。言初
九當爲人之所建。而非謂其自建也。蒙之初六曰
發蒙曰利用刑人。言處蒙初之道當如此。而非謂
初六能發人之蒙與刑人也。畧舉數爻。可以例推。
他若否之六二曰小人吉。大人否。亨。觀之初六曰小
人无咎。君子吝。剝之上九曰君子得輿。小人剝廬。
恒之六五曰婦人吉。夫子凶。遯之九四曰君子吉。

小人否大壯之九三曰小人用壯君子用罔革之上六曰君子豹變小人革面此七爻者不得如舊說以一人當之矣又豈可云兩人而共一爻乎

卦各有主則爻從之需之取義在剛健而不陷故六四之需于血亦謂乾也非乾不能需也節之取義在以剛節柔故六三之不節言剛不節柔也上六之苦節言剛節柔而至于太過也皆非以本爻言也如此例者亦多可以類推

又師之初六及六五言用兵之道泰之九二言平天

下之道。九三言保泰之道。乃泛論一爻之道。當如此。尤非以人言也。此例亦多。

論卦爻取義之例

凡爻辭取義其例有三。愚前于論應篇已發之矣。剛柔有性情。六位有優劣。所值之卦有體象。以此三者求之。其義自見。後儒紛紛言象。皆舍本而求末者也。至若立象盡意。或假物類。或準事情。變動不居。初无定格。有取諸上下爻者。如屯之六四。目九

五爲婚媾。

舊說以爲初九誤

蒙之六三。目九二爲金夫。

舊說

易學要言
卷一
以爲上
九誤

是也有取諸前後爻者。蒙之困蒙比之匪人。皆以在羣陰之間。是也有合數爻而易地殊觀者。如師卦五陰自九二視之爲衆。自六三視之爲尸。自九五視之爲禽。是也。畧舉其例而皆不出乎前三者。應之說定而象之說亦定矣。

又按隨之義取于自後從前。故六二係小子謂前之六三。失丈夫謂後之初九。六三係丈夫謂前之九四。失小子謂後之六二。九四隨有獲謂前之九五。以卦本名隨。故爻之取義如是。在他卦則有不

然者。如比卦。以上下應爲義。而爻之合者。僅六四也。觀之義。取自下視上。故下四爻。皆可以觀。五言然。如臨之。以剛臨柔。而四柔爻。則仍自爲義。不取于剛之相臨也。剝之義。取于剝陽復之義。取于復陽。故兩卦之柔爻。不能離初上之剛爻。以立義。然在夬姤二卦。則又不盡然也。後儒于隨。則以應比立論。而不知其偶。因卦名而立。于觀剝。諸卦。則以主爻立論。而不知其適緣卦義而生。无怪其所合者少。而所不合者衆也。

八卦之象說卦傳所載可謂博矣其大者如天地雷
風水火山澤傳蓋間用之以釋彖辭至文王之彖
辭爻辭則皆未之見焉且其所取更有異焉者如
乾之六爻皆取于龍蠱之五爻皆取于父母噬嗑
之四爻皆取于食物咸之六爻艮之五爻皆取于
身體漸之六爻皆取于鴻小過之初與上皆取于
飛鳥井鼎皆取諸其器若是者未嘗屑屑于說卦
之象解經者又安得以說卦之象爲其象乎

吳氏沆曰坤內順而爲牛坎中堅而爲車巽爲風木

象舟之行而利于涉川此亦理之常也而睽革旅
既濟言牛乃並無坤而有離大有大壯大畜小畜
言車輿乃並無坎而有乾需訟同人大畜言利涉
大川乃並無木而有天是離之內順亦可以比坤
而爲牛乾之中堅亦可以比坎而爲車天之不陷
亦可以比風木而爲涉川矣又曰若乃飛動如乾
則非龍不足以象之也危懼如履則非虎不足以
象之也其來有序期以日月如漸之進則非鴻不
足以象之也剛狠如大壯屯迴如屯則非觸藩乘

馬不足以象之也。歷觀諸卦取象大抵不一。唯此五卦首尾言之少者三四多至五六蓋非此不足以盡之也。是故在壯而言羊則不必皆有兌也在屯而言馬則不必皆有震也。居履而危懼雖无艮體亦不害其爲虎也。所以成大體者如此則其小者可畧而勿問也。易璣按吳氏此論最爲明通。他若蠱之五爻皆取于父母以天下之事无非前人之所遺也。咸之六爻艮之五爻皆取諸身體以物之相感者以形又動而難止者亦惟形也。

易六位而成章舊說以爲有互卦是十二位矣洪範
占用二謂貞與悔也如舊說則內卦外卦皆亂貞
與悔不可得而定矣且其說亦多不驗如謙之初
六用涉大川言互卦者必以爲中有互坎然蠱大
畜頤諸卦之涉川未嘗有互坎也屯之六三入于
林中言互卦者必以爲中有互艮然同人之升其
高陵未嘗有互艮也他類此者甚多其原出于左
傳乃一時占筮所用非說易之正法而或以大傳
之中爻當之不亦誣乎至大體厚體之說其謬不

必辨矣

繫辭中所謂來者自无而之有。猶言方來也。所謂往者自下而至上。猶言前去也。觀于泰否之言往來可知矣。復之傳曰利有攸往剛長也。夬之傳曰利有攸往剛長乃終也。蹇利西南往得中也。謂上之坎解利西南往得衆也。謂上之震其來復吉乃得中也。謂下之坎抑又可證焉。若其他言往而不言來言來而不言往。但以事言不取義于爻畫之間者亦多。先儒于往來之說率欲通以卦變甚爲支

離于言上下者亦然

上下之義已見
各彖辭傳解

先儒謂來爲自外而復于內此誤也夫言來復與言
來者不同來復重在復來止重來若以來爲復于
內則比之不寧方來離之突如其來困之朱紱方
來與夫震兌之來何與于復內之義乎

凡經之言西南皆謂前也東北皆謂後也後儒乃謂
西南爲退後東北爲前進蓋惑于後天卦位之說
而以爲陰卦皆在西南陽卦皆在東北故也按蹇
解之西南傳皆曰往知往爲前去之義則西南不

可謂之退後矣。况明夷之南狩升之南征非皆向前之義而何。坤之西南得朋欲陰之進而合于陽也。故曰乃與類行東北喪朋欲陰之退而自絕其黨也。故曰乃終有慶豈可以西南反爲退東北反爲進乎。且猶有可證者。密雲不雨自我西郊。小畜彖辭指外卦之巽而言。小過六五傳曰已上也。隨王用亨于西山。在上六既濟西鄰亦謂九五西南之爲前其義尤昭然明矣。

古者祭天于南郊。禮曰于南門外祭地于北郊。禮月與四瀆于北門外。皆以南爲陽北爲陰。又

堂室之制賓階在西主階在東曲禮云席南向
北向以西方爲上東向西方爲上古人
以西南二方爲上則西南之爲陽爲前
可知矣今日西南陰方東北陽方何邪

庚甲之說古今貿然以求之者過也夫聖人豈有艱

深隱晦之辭巽之先庚後庚卽无初有終之義

正見

解爻辭傳不釋以其易明也蠱之先甲後甲承上

涉川而言傳曰利涉大川往有事也先甲三日後

甲三日終則有始天行也言終則有始乃天運之

自然有事者當圖維于事之前後若事至而謀之

則不克濟者多矣聖人之意亦易明也他若復曰

七日來復震與既濟之勿逐七日得義與復同也。臨之八月有凶陽消而陰長也。屯復頤之十年數之極也。同人坎困漸豐之三歲既濟未濟之三年皆言其久也。震驚百里遠也。躋于九陵高也。訟之三百戶多也。師之三錫晉之三接革之三就巽之三品皆言其多也。比之三驅損之二簋言其少也。言血者坤之上六屯之上六需之六四渙之上九言酒食者需之九五坎之六四困之九二未濟之上九言幽暗者需之出自穴入于坎坎之入于坎窞。

困之入于幽谷、小過之取彼在穴、自坤小過未濟而外、皆屬坎體、言國邑者、訟之九二師之上六比之九五泰之上六謙之上六晉之上九益之六四升之九三自晉益而外、非屬坎卽屬坤、皆所以況陰物也。

言兵戎者、同人之伏戎、大師離之出征、晉之伐邑、明夷之南狩、旣濟未濟之伐鬼方、說者以爲離爲戈、兵固也、然謙之六四屬坤、亦曰侵伐、夬之九二屬乾、亦曰有戎、若家人之男女正位、指爻睽與革之

二女同居指卦象不可泥于茲益信矣。

言王假有廟者二皆謂祖廟也然彖辭傳于萃則曰致孝享也于渙則曰王乃在中也其義別矣蓋萃主于合莫渙主于定一尊若先王以享于帝立廟大象之說又別。

言幽人者二皆說體之中爻剛中而不奪于外誘也。爻在初而以趾言者則有噬嗑賁大壯夬鼎艮以尾言者則有遯既濟未濟以足言者則有剝爻在上而以首言者則有比離既濟未濟以首之屬言者。

則有噬嗑

耳

大過

頂

咸

輔類

晉

姤

角

以天言者則

乾之九五如大有大畜明夷中孚亦皆上也至于
爻在下卦而以下體言者則有咸艮之二皆曰腓
咸明夷之三皆曰股爻在六畫之中而以心言者
若乾三之惕臨三之憂井三之心惻艮三之薰心
履四之愬愬咸四之憧憧明夷之四之獲心旅四
之不快又凡爻言黃者取中之義坤之黃裳噬嗑
之黃金鼎之黃耳皆在五爻離之黃離遯之黃牛
解之黃矢皆在二爻

惟革在初

若斯之類皆所謂以爻

位之上下貴賤而取義者也。然剛柔之性情本卦之體象。亦有不能外焉。

按經中貞字不皆訓正。故有利永貞。又有勿用永貞。有可貞。又有不可貞。有貞吉。又有貞凶。貞厲貞吝。蓋貞有二義。一訓正。一訓常。讀者當各以本辭求之。如貞吉之貞。應作正解者固多。應作常解者亦多。若貞凶貞吝之屬。則宜俱作常解。言如是而獲凶與吝者。理之常也。天下豈有出于正而聖人以爲凶吝者乎。

舊說有謂雖正亦凶者不可從

亨彖辭之例也。爻辭言亨者，惟否之初六、六二、大畜之上九及節之六四、四爻然，亦不必曲爲之說。譽者安樂之意，與毛詩式燕且譽、韓姁燕譽之譽同。非名譽之譽字，書謂宜與裕通是也。經中諸譽字皆作此解，舊說誤。

論經名不可讀入聲

經之以易名也，必有至理存焉。鄭康成謂易一名而含三義：易簡一也，變易二也，不易三也。夫易簡之易，讀去聲；變易不易之易，讀入聲。一名而有三義。

易。簡。可。也。一。名。而。有。兩。音。可。乎。按。繫。辭。傳。發。明。易。簡。至。再。至。三。易。簡。者。乾。坤。之。德。人。之。心。也。而。易。又。足。以。該。簡。經。之。名。易。端。在。于。此。以。去。聲。之。讀。爲。正。孔。穎。達。謂。當。讀。爲。難。易。之。易。是。矣。而。仍。有。取。于。鄭。氏。之。說。其。于。兩。音。之。譌。初。无。定。見。可。知。至。宋。儒。惟。以。交。易。變。易。爲。言。則。其。見。出。鄭。孔。下。經。雖。存。而。名。亡。矣。春。秋。傳。子。服。惠。伯。曰。且。夫。易。不。可。以。占。險。易。險。對。舉。愈。可。以。知。古。讀。矣。

論爻辭非周公作

易之興也。其當殷之末世。周之盛德。邪。當文王與紂之事。邪。觀此。則彖爻之辭。皆文王所繫。大傳有明文矣。司馬遷揚雄班固之說。皆同。其後有謂爻辭多文王以後事。孔穎達曰。如升卦。王用亨于岐山。武王克殷。始追號文王爲王。又如箕子之明夷。武王觀兵之後。箕子始被囚。奴文王不宜豫言之。按天子祭天下名山。大川。岐山雖在周之封內。殷人得而祭之。如以王爲謂文王。則易之言王多矣。豈皆謂文王邪。至箕子之晦其明。又豈因囚奴而始

見乎泥亦甚矣。又引韓宣子適魯見易象云。吾乃知周公之德。夫左氏之言。反以爲據。而大傳之明文。何以遂忘之邪。乃馬融陸績諸儒。忽謂爻辭出于周公。而王輔嗣因之。至于今不改。大抵後儒之言。易多不信。孔子又不獨此也。

彖主于言象。爻主于言變。聖人有以見天下之動。而觀其會通。以行其典禮。是故易之大用。惟在于爻。若繫彖而不及爻。則文王所作爲。无。用。之。書。矣。

吳氏沆曰。謂箕子明夷。非文王之言。則可。若以一語。

可疑遂轉爲周公則不可

易

俞氏琰亦以爻辭

爲非周公作

易集說

論十傳今名之不當

十翼諸名定于漢儒多有未當不可以不辨按繫辭傳曰聖人設卦觀象又曰聖人有以見天下之賾而擬諸其形容象其物宜是故謂之象又曰八卦成列象在其中矣又曰八卦以象告凡所謂象皆指卦而言也語其體謂之象語其用又謂之彖故曰彖者材也又曰彖者言乎彖者也觀此則彖與

象皆以卦言而爻不得專謂之象可知矣。是故卦下所繫乾元亨利貞之類。謂之彖辭。孔子所作大哉乾元以下。則彖辭傳也。爻下所繫潛龍勿用之類。謂之爻辭。孔子所作潛龍勿用陽在下也以下。則爻辭傳也。今以彖辭傳而名曰彖傳。爻辭傳而名曰象傳。又以所謂象傳者。目爲小象。而于天行健。君子以自強不息之類。目爲大象。又自分傳附經之後。遂不曰彖傳而直謂之彖。不曰象傳而直謂之象。揆之義理。皆爲乖舛。至繫辭傳在孔門不

知名爲何傳而今謂之繫辭傳則亦誤蓋此傳統論易之全體大例有在卦爻以前以外者所言不止于繫辭也若以此名加之彖辭爻辭二傳則又當何則文王所繫于彖爻者乃謂之繫辭也至若文言傳之名亦未詳其所謂先儒以文爲文飾之意或曰依文而言其理蓋皆不得其解而強爲之說者今槩稱曰傳其目如左

傳一 卽上彖傳 傳二 卽下彖傳 傳三 卽上象傳 傳四

卽下象傳 傳五 卽大象傳 傳六 卽繫辭傳 傳七 卽

文言傳 傳八 即說卦傳 傳九 即序卦傳 傳十 即雜

卦傳

按吳氏仁傑謂小象乃孔子所以釋爻辭者當曰繫

辭傳

古周易

是也然又以孔穎達繫辭通指卦爻之

辭之言爲非則不然至俞氏玉吾譏先儒稱象傳

之非而自謂之爻傳

易集說

不謂之爻辭傳亦未爲

盡善也

論大象傳不可附經

大象六十四條以天地雷風水火山澤爲象以聖人

先王君子之事爲用象取其至大事亦舉其至大
蓋孔子之特筆也然與繫辭多不相謀如嚮晦宴
息之于隨厚下安宅之于剝折獄致刑之于豐議
獄緩死之于中孚皆彖爻之義所絕无者于此見
聖人之用易不同于法而同于道易之所以爲大
也至後儒以傳附經欲便學者之誦讀惟彖爻二
傳之于經乃如車之有轅屋之有椽其用有相成
而不可缺者故不可不合而爲一也若大象則當
別而著之

按薛氏溫其曰大象孔子獨出之事。義海撮要胡氏一桂

曰六十四卦大象與卦彖爻義全不相蒙又別是

說一道理只合自作一處爲是。啓蒙翼傳

又按鄭氏汝諧曰余嘗論成卦之名取義不一不必

泥大象而爲鑿說觀于噬嗑一卦尤可見也彖曰

頤中有物曰噬嗑大象則曰雷電噬嗑使聖人不

言之于彖則釋經者必牽合雷電而爲噬嗑之說

矣。翼傳鄭氏之論正愚不欲以大象附經之意也

又按大象所言既多異于彖爻而繫辭傳十三卦之

所取又无一與大象合者于此皆見易道之大

論說卦序卦二傳之當闕疑者

易遭秦火而獨完以其爲卜筮之書然最完者乃上下二經耳至十翼中如彖象等傳有經可附猶不至于錯亂元熊氏朋來謂自先儒以乾坤二卦各附文言而諸卦文言散逸今見于繫辭傳厘存者无幾而乾上九之文言亦在其中可見繫辭傳中釋爻辭者卽諸卦之文言如鳴鶴在陰一段爲中孚九二文言其論不爲无見至十翼在漢初惟存七篇說卦序卦雜

卦三篇宣帝時河內女子得之

經籍志云宣帝時得說卦三篇俞氏

王吾謂漢儒總名之曰說卦至晉韓康伯始分出序卦雜卦之名

其中不无可疑

者說卦中如天地定位一章後儒援引以爲先天卦位非傳本意至帝出乎震萬物出乎震兩段實與他處義理不侔嘗讀漢書禮樂志云武帝祠太乙于甘泉就乾位也注云言在京師西北是時說卦之文未出而卽有此說蓋出于方士所言如郊祀志東北神明之舍西方神明之墓之類郊祀志又云劉向父子以爲帝出乎震故包犧氏始受木

德其後以母傳子終而復始蓋自戰國推五勝之說從其所克獨向歆之論五行以相生爲序故推原包犧之受木德而終始之以明漢爲火德故謂帝出乎震者此也然則說卦中之二段其爲向歆所竄以重其私說亦未可知學者存而闕之可也乃陳希夷之徒指以爲後天方位豈不誤乎然則河圖洛書得列于繫辭傳亦此類也

妙萬物而爲言老氏之書始有妙字並不見于聖經此亦可疑之一端也

說卦傳曰。乾爲馬。震爲龍。按乾之五爻。皆取于龍。他卦言馬者。惟大畜有乾。餘皆无乾也。諸卦震體反无取于龍者。坤利牝馬之貞。離畜牝牛。吉。傳乃于坤不言馬。于離不言牛。至若大畜。睽有豕而无坎。大壯有羊而无兌。卦有金者。惟姤。卦有乾。損益有龜。而卦皆无離。晉有鼠而无艮。離爲戈兵。而謙之利用侵伐。復之用行師。未嘗有離也。艮爲門闕。而同人之于門。隨之出門。明夷之出門庭。節之不出門庭。皆未嘗有艮也。乾爲寒。爲冰。而經之履霜。堅

冰乃見于坤。兌爲巫而經之用史巫。乃見于巽。兌爲妾而經之得妾亦見于巽。若斯之類不可枚舉。雖經之取義在今日有不能盡知者。若傳所列或當年卜筮家之所用。要不可執之以疑經而遽入于互變飛伏之穿鑿也。

六十四卦其兩兩相比者以反對成用而剛柔之盛衰進退則存乎其序焉。故卦之序不可不明也。然傳旣晚出恐非原本義有未協難可強從。如需者飲食之道物畜然後有禮故受之以履。二卦本无

此義乃附會大象之語而成文者。又如主器者莫若長子，故受之以震。按男女之象，惟三畫之八卦有之。故睽之離兌，革之兌離，皆曰二女同居。今六畫之震，是二長子矣。于義安乎？他若隨之于蠱，而曰以喜隨人者，必有事觀之于噬嗑，而曰可觀而後有所合。大過之于坎，而曰物不可以終過，故受之以坎。大壯之于晉，而曰物不可以終壯，故受之以晉。夬之于姤，而曰決必有所遇。井之于革，而曰井道不可不革。中孚之于小過，而曰有其信者必

行之小過之于既濟而曰有過物者必濟若斯之類義多未安而不見自然之妙故序卦一傳雖不敢與尚書毛詩之序同類並譏而欲遽信爲聖人之手澤則亦過矣

按家伊川曰說卦所說方位亦不能使人曉然所當闕之不必強通也

大易緝說

又曰易八卦之位原不曾

有說先儒以爲乾位西北坤位西南乾坤任六子而自處无爲之地此大故无義理風雷之類于天地間如人身之有耳目手足便是人之用也豈可

謂手足耳目皆用而身无爲乎。

周易會通

朱子曰文王

八卦不可曉處多。如今只看他底慣了。似合當恁

地相似。姑缺之。

大易緝說

趙氏汝楫曰。疑說卦後章爲

占家玩占之象。後人或取以附夫子說卦之末。猶

諸緯皆稱夫子之筆是也。况此文失于漢初至孝

宣時。河內女子發老屋得之。又荀鄭馬虞諸家之

象多寡不同。以故不能不起後世之疑。

易雅

韓氏康

伯曰。序卦非易之緼。

注疏

鄭氏樵曰。序卦之文蓋不

協矣。有義之不苟合者。有義之苟合者。是豈聖人

之言邪不可強爲之說

六經與論

王氏申子曰易自有

序但莫曉其間諸卦次第如何安排耳若夫序卦

之文義乖理淺決非聖人所作愚正不曉伊川何

所取而卦卦引之以作傳也

大易緝說

金氏君卿曰說

卦序卦殆非聖人之意

義海撮要

雜論

按繫辭傳八卦始于伏羲重卦亦始于伏羲謂始于

神農以後者非也重卦之名宜始于文王連山歸

藏卽有名亦必不與周易同

按環溪吳氏亦言重
卦之名定于文王

或曰宋代考訂周易古本者凡數家孰爲最善本義
之用古本是乎否邪曰戰國以後吾不知易之孰
爲古本也。何以知之。卽以今日十翼之名知之。至
本義之用古本。則自有說矣。晁氏說之之言曰。易
古經始變于費氏。而卒大亂于王弼。今悉還其舊
庶學者不執彖以徇卦。不執象以徇爻。朱子因之
遂曰。熹嘗以爲易經本爲卜筮。而作其言雖約而
所包甚廣。夫子作傳亦畧舉其一端以見凡例而

已然自諸儒分經合傳之後學者便文取義往往未及玩心全經而遽執傳之一端以爲定說。于是。一卦一爻僅爲一事而易之爲用反有所局。而无以通乎天下之故。云云。夫以聖人而解聖人之書。此他經所无。而惟易爲然。孔子必有大不得已于此者矣。今日畧舉一端以見凡例。則十翼之作不多見其可已邪。且斥傳不可以爲定說。而慮學者執彖以徇卦。執象以徇爻。是孔子之作十翼。不惟可已。且甚害于文王之經。而不若其无之矣。嗚呼。

是何說哉。故嘗謂朱子之用古本。以復古爲名。而實欲學者舍傳言經。以樹其孔子之說。非文王之說之。剏論不可不察也。然方謂執孔子之傳而一卦一爻。僅爲一事。易之用遂有所局。乃其所自爲說。如晉二爲享先妣之吉占。解二爲卜田之吉占。益二爲卜郊之吉占。等語。又豈非一卦一爻。僅爲一事乎。其與畧舉一端。以見凡例者。得失爲何如邪。他日朱子有曰。聖人作易。本爲卜筮。然其辭固包義理在其中。孔子恐人只于卜筮上來。一向泥

著方以義理解之。可謂至論矣。

天德不可名言。聖人不得已而以剛目之。大抵取其
无所不統。至誠无息之義。若柔之爲柔。不過以順
乎剛而得名。要而論之。剛固至矣。而柔亦无不美
也。故聖人言剛必言柔。言柔必言剛。此天地夫婦
君臣所以設位成能之故。至其所不取者。剛之失
位。柔之變剛。而外此則不獨剛无貶辭。而柔亦未
嘗加以非議也。詳玩經傳。自見其義。後儒于剛中
柔中之外。凡遇言剛者。卽指爲剛強剛悍之剛。遇

言柔者。卽指爲柔靡柔佞之柔。誤矣。不明于剛柔之說而言易可乎。

朱子以潛龍爲象。勿用爲占。何如。曰。以爲象。則皆象。以爲占。則皆占。傳曰。動則觀其變。而玩其占。又曰。極數知來之謂占。觀此。則潛龍亦占也。傳曰。吉凶者。失得之象也。悔吝者。憂虞之象也。觀此。則勿用亦象也。

數往者順。如乾之由潛而見。而惕而躍而飛而亢。此已見之易卦象。旣明可順數者也。知來者逆。如一

事忽來。不能定其爲吉爲凶。爲悔吝。此未形之易。動變未著。須逆知者也。易重知來。故卦之有爻。自下而上。有逆推之象。故曰易逆數也。

爻用九六。舊說有二。一者乾畫有三。坤畫有六。陽得兼陰。故其數九。陰不得兼陽。故其數六。二者老陽數九。老陰數六。老陽老陰皆變。周易以變者爲占。故以名爻。後儒謂用九者合天之數。一三五也用六者合地之數。二與四也。以上皆曲說。不可從。蓋九者天之極數。六者地之中數。天非極數。不能統

柔地非中數不能承剛。易以名爻。乃天地自然之數。至精以微之理。若徒求之著策。此所謂无本之學也。

九以名陽爻。六以名陰爻。又獨于乾坤言用九。用六者。二卦得陰陽之純。言乾之所用皆九。坤之所用皆六也。他卦則或九或六。不可以言用九。用六矣。又古易爻辭係于逐爻之下。而无初九。六二之名。故于六爻之純陽純陰者。指言用九。用六。以明他卦之例。至于乾之用九。言見羣龍无首。吉。坤之用

六言利永貞。此又所以明全易剛柔之定理。不可不知也。

以九六求所遇之爻而謂之變。此筮家之法也。朱子謂六陽皆變則乾轉而爲坤。以釋用九。其說本之蔡史墨。按蔡墨雖以用九爲乾之坤。而仍舉用九之辭。初未嘗曰此卽坤之象也。猶其曰乾之姤。仍曰潛龍勿用。而不曰繫于金柅也。于此見變之爲言。雖在筮家。亦无遂舍此而之彼之意矣。若乃剛柔各有正理。有定分。一成而不可易。曰用九。曰用

六。乃。聖。人。教。天。下。以。盡。剛。柔。之。道。而。欲。其。不。變。也。
今。曰。剛。變。柔。柔。變。剛。求。之。聖。經。无。其。文。驗。之。天。下。
无。其。理。豈。不。謬。之。甚。乎。

太。極。卽。一。陰。一。陽。之。謂。道。陰。陽。无。形。而。有。數。聖。人。出。
而。紀。其。數。奇。耦。是。也。易。有。太。極。易。卽。此。書。也。是。生。
兩。儀。言。易。之。書。由。有。陰。陽。而。後。生。奇。耦。之。二。畫。以。
明。書。中。之。奇。耦。卽。天。地。間。之。陰。陽。而。非。有。他。後。人。
躋。太。極。于。陰。陽。之。上。而。又。不。知。是。生。兩。儀。卽。指。作。
易。者。而。言。于。是。紛。紛。之。論。河。漢。而。无。極。矣。

繫辭傳大衍之數五十其用四十有九王輔嗣不知
五十之有脫文而曰虛其一以象太極宋儒以下
莫不承用其說未可信也夫大衍之數卽天地之
數也自未形未判以至於萬變不測皆是也古之
揲蓍者效法焉其法有分掛揲歸之不同有象兩
象三象四時象閏之各異用之有序而言必當物
傳固有明文矣乃若一之爲一未分以前旣以之
象太極旣分以後復以之象三一物而頓有二用
不能无啓天下之疑且誠有是理孔子亦安能默

而已乎。故曰：未可信也。或曰：吾聞五十之下脫有五二字，信乎？曰：然。然則何以大衍虛其數之六也？曰：所以待六爻之變動而識之也。然則孔子何以不言曰：當日筮家之所共知，不待言也。

兩天地之象也。三人象也。人立而天地之位正。一掛而大衍之用行。故掛一爲筮法之大用。所以生變化而成九六也。知此則知不得又有所謂一者而虛之以象太極矣。

易有太極是生兩儀。兩儀謂一奇一耦也。兩儀生四

象四象謂三畫之經卦也。四象生八卦。八卦謂六畫之重卦也。何以知四象之爲經卦也。乾坤純奇純耦爲二象。震坎艮一奇二耦。巽離兌一耦二奇爲二象。非四象乎。邵堯夫于一奇一耦之上各加一畫分陰陽太少謂之四象。其說誕矣。何以知八卦之爲重卦也。下文明言八卦定吉凶。定吉凶者重卦之事。若三畫之卦豈能定吉凶乎。易有四象所以示也。上而兩儀下而六十四卦統而言之者也。

繫辭傳言八卦者凡六曰八卦相盪曰八卦而小成
曰八卦成列此謂三畫之卦也曰四象生八卦曰
八卦以象告此謂六畫之卦也于是始作八卦則
兼三畫六畫之卦而言

按周禮太卜掌三易之灋其經卦皆八其別皆六十有四而占人以八卦占筮之入故以祇吉凶其占人所謂八卦與大傳四象生八卦八卦以象告之八卦同亦謂六畫之卦也
乾坤成象成形之本也震巽未成乎象艮兌已成乎
形坎離在形象之間八卦先後之序如此論其至
八卦俱非有形者惟于无形之中亦有輕重虛實

之次第。故其成象成形之輕重虛實。以爲次第也。先儒謂乾坤坎離覆而无變。震巽艮兌覆而相變。按乾坤一于健順。坎離一于明暗。不相爲用。此四卦之所以覆而无變也。震艮動則必止。止則復動。巽兌入則必說。說則更入。其用相因此。四卦之所以覆而相變也。

震得乾之初氣。故其健有似于乾。巽得坤之初氣。故其順有似于坤。

剛柔相摩。八卦相盪。下文雷風震巽也。日月坎離也。

男女艮兌也不言山澤而言男女成形者以人爲貴也。六卦皆乾坤所成于男女而重言乾道坤道者言乾坤之道盡于人也。雷風日月之成象道未嘗不存于其間。惟男女之成形而道始盡。其他成形者不足以盡道也。故艮兌有專屬男女二象。惟繫辭傳首章見之。

問艮兌既有男女二象而六十四卦中又以山澤之象爲主何也。曰山澤在地之成形者也。自當與雷風水火一例。人則通乎天地而爲三才。若與物象

一例則失其所以大矣。繫辭傳首章所云特取之象也。義固各有取爾也。

上經首乾坤下經首咸三才之義也。咸爲夫婦之道。下艮上兌。愈知乾道成男坤道成女爲艮兌二象无疑矣。

乾彖之元亨利貞與諸彖辭一例以朱子之義爲正。蓋乾雖屬天道而卦則爲人之用乾道者而設。聖人旣言乾之元亨而又以利貞爲訓。欲人于六爻時位之殊處之皆得其正而後爲能用乾道也。故

六爻異辭皆所以發明利貞之意。文言所謂知進退存亡而不失其正者是也。至文言析元亨利貞爲四德、當自爲解而斷不可用之以釋彖辭者也。故易六十有四卦一言以蔽之曰利貞。

彖辭傳稱乾元坤元以乾坤爲道之首故也。與元亨之元不同。先儒以四德釋乾之彖辭傳亦誤。

坤者至順之象。順者順乎乾而不自見之謂也。初之履霜戒其始見。四之括囊戒其見于外。上之龍戰惡其敵陽。坤之不美者。惟此三爻舊說謂剝盡則

爲純坤是坤之劣甚于剝矣而何以配乾元而稱承天哉謂剝盡爲龍戰則可也

易首乾坤天地之象也天地初闢世道必危險人心必蔽塞卦有屯蒙而世道人心之象見矣人心既開機變乃起循理者安于義命逞欲者出于爭奪卦有需訟而君子小人之象見矣天下之生日衆衆必有所歸而後安歸必定于一而後正卦有師比而諸侯天子之象見矣六卦先後之序如此而皆不離乎坎一以見險之難平一以見剛中之用

大也

乾坤之後至小畜而出于險。繼屯蒙者需。天地之險阻。未開不能无所待也。繼師比者小畜。人道之險阻。初平不可以驟有所進也。故需與小畜卦義相似。但需不論久暫而小畜則以暫爲義耳。

上經十一卦而爲泰。十二卦而爲否。治亂者天行之定數也。下經十一卦而爲損。十二卦而爲益。利害者人道之相因也。

巽卦于六子中始見一陰。故取義于順乎天德。其用

甚大。後儒不察彖辭傳以申命三字爲衍文而誤援大象之申命行事遂僅以發號施令解之先庚後庚之訓尤穿鑿无義理按易卦自噬嗑之利用獄而外以一事用一卦者絕少况八純卦之大而僅當一事可乎或曰凡卦之有巽者多言文教風俗之事何也曰此見于大象如小畜觀姤諸卦皆因巽之取象于風而設而彖辭爻辭不言不可援彼以附會申命之文也。

有卦義似同而實異者如大有之于豐晉之于漸蹇

之。于。困。解。之。于。渙。之。類。而。各。觀。其。所。對。之。卦。則。知。
其。所。以。異。也。有。卦。名。似。同。而。義。則。異。者。如。大。畜。之。
于。小。畜。小。過。之。于。大。過。而。各。舍。其。所。對。之。卦。則。皆。
不。能。明。其。義。也。蓋。小。畜。自。與。履。對。大。畜。自。與。无。妄。
對。大。過。自。與。頤。對。小。過。自。與。中。孚。對。先。儒。不。講。于。
反。對。之。義。故。其。說。四。卦。也。尤。誤。

繫辭大端以吉凶悔吝无咎數者爲斷吉與无咎屬
善凶與吝屬不善而總以悔爲上下之關鍵蓋吉
凶等屬事悔屬心人之所以靈者心而已故知悔

則可以无咎。可以吉。不知悔。則至于吝。至于凶。故曰震无咎者存乎悔。然悔之爲言。非欲其已至于悔。而能悔也。知其將至于悔。而能勿蹈之爲貴。故曰憂悔吝者存乎介。

易之垂世立教。在于吉凶。第所謂吉凶者。唯視乎理之順逆。而事之得喪。不與焉。故君子无凶。而小人有凶。君子而時乎有凶者。德未至于中正也。小人无往不凶。而否之包承。剝之以宮人。寵反以依附。君子爲吉。則易之所謂吉凶。所以異于術數之說。

易學要義 卷一
而順性命之理以立天地之心者其故可得而明矣。

三百八十四爻无在非吉亦无往非凶顧人所以處之者何如耳傳曰時乘六龍以御天知其爲亢龍而避之是所以乘亢龍也二五之爲中正以位言之耳中正實不在二五也善易者知之矣。

大傳曰作易者其有憂患乎人能憂患則心德常存而不至于滅天理窮人欲以自蹈于危險故又曰百物不廢懼以終始其要无咎此之謂易之道也。

後人見易道興于文王而孔子又嘗言紂與文王之事。于是動引羨里以實憂患之說。可謂陋矣。夫憂患者修身寡過之本。六經垂訓其道同歸。而易爲尤著。易至文王而興。猶春秋至孔子而作。皆聖人之不得已。作易者不必囚羨里。作春秋者不必在下位也。誠如後儒之說。則中庸戒慎恐懼。孟子有終身之憂。又豈皆因羨里乎。然則孔子何故言紂與文王曰。非大亂之時。則易不作。所以爲不得已也。明夷言以蒙大難。則其爲指羨里無疑矣。曰。

亦非也。難而曰大言事。關於天地民物。而不可以爲細故也。蒙者。猶救焚拯溺。而深入于水火之中也。

卦既有中孚矣。而諸卦之彖辭。爻辭。亦多言孚者。坎之有孚。傳謂行險而不失其信。萃卦凡三言孚。革卦凡四言孚。萃而不足于信。則有離散之憂。革而不足于信。則有紛更之慮。聖人之致意深矣。

繫辭傳曰。聖人以通天下之志。今按彖爻傳中。幾于无卦不言志者。所以明易之爲心學。且示天下以。

用易之要也學者習而不察故知易者鮮矣

錄諸儒辯誤之說

異說害易不一而足愚旣以所見著之于篇其先天河圖諸說之誤前儒已有辯論者不敢復爲增益彙錄于左備參考焉

先天圖

黃氏震曰易至宋而程伊川作傳謂易之道備于辭推辭考卦可以知變而象與占在其中故其爲傳專主于辭時則有若邵康節又別求易于辭之外

謂今之易後天之易也而有先天之易焉。用以推
占事物。无不可以前知。自是二說並興。言理學者
宗伊川言數學者宗康節。同名爲易而莫能相一
至晦菴作易本義啓蒙乃兼二說。謂易本爲卜筮
而作。謂康節先天圖得作易之原。謂伊川言理甚
備。于象數猶有關。學者翕然向往之。揣摩圖象日
演。月高以先天爲先。以後天爲次。而易之上晚添
祖父矣。夫易誠爲卜筮而作。然吉者必其合乎理。
吝者必其違乎理。因理爲訓。使各知所趨避。自文

王孔子已然。不特伊川也。若康節先天之說。則易之書本无有也。其援易爲證者。凡二章。一援易有太極一章。曰此先天之卦畫。一援天地定位一章。曰此先天之卦位。皆與聖經判然不合。且此二章果誰爲之。謂出于孔子。孔子无先天之說也。謂出于伏羲。伏羲未有易之書也。何從而知此二章爲先天圖。方畫于康節。何以明其爲伏羲。嘗聞先天爲演數設也。康節旣沒數學。无傳。今所存之空圖。殆不能調絃者之琴譜。晦菴雖爲之訓釋。他日蒼

王子合書亦自有康節說伏羲八卦近于附會穿鑿之疑則學者亦當兩酌其說而審所當務矣

焦竑

周易古本

歸氏有光曰易圖非伏羲之書也邵子之學也邵子以步筭之法衍爲皇極經世之書有分秒直事之術其自謂先天之學固以此要其旨不叛于聖人然不可以爲作易之本也自漢以來无有以圖爲說者蓋以圖說易自邵子始吾怪夫儒者不敢以文王之易爲伏羲之易而乃以邵子之易爲伏羲

之易也。

前同。

李氏塋曰：易有太極一節。朱子據陳搏先天圖以爲聖人作卦次第，載于本義經首。然一細勘而知其誣也。如改一索再索三索之序而爲乾一兌二離三震四巽五坎六艮七坤八，是父母與六子並生，且六子俱先母生，少女先中女，中女先長女生矣。有是理乎？易之爲卦，三畫六畫而止。今三畫前有二畫，後有四畫五畫六畫之外，尚有七畫八畫以至无窮畫卦如此，則六十四卦之理猶有未盡矣。

不亦明背聖言乎。若卦氣之說尤舛。或問朱子卦氣陽生陰生始何踈而終何密。臨二陽生爲冬十二月卦。乃在春分二月半。泰三陽正月卦。乃在立夏四月初。推之一槩乖反。朱子亦不能答。曰未得其說。容更思之。又曰伏羲易自是伏羲說話。文王易自是文王說話。不可交互求合。嗚呼是何言也。羲文有二易邪。胡朏明曰先天圖以自震至乾爲順數。已生之卦。自巽至坤爲逆推。未生之卦。然則經曰易逆數也。豈專用巽坎艮坤而不用乾兌離。

震乎至天地定位一節无南北方隅一字何所據
而以爲先天卦位屬之伏羲以帝出乎震一節爲
後天卦位屬之文王尤爲不經文言曰先天而天
弗違後天而奉天時言大人行乾之事也孰謂卦
畫而有先天後天之稱乎此皆其顯然可議者而
後儒遵之不可解也

周易傳注

廷祚按六經與論先天之學出于麻衣道人麻衣傳之希夷又朱震進周易表陳搏以先天圖傳神放放傳穆修修傳李之才之才傳邵雍放以河圖洛書傳李溉溉傳許堅堅傳范諤昌諤昌傳劉牧修以太極圖傳周敦頤敦頤傳程顥程頤然則河洛太極諸圖並出希夷而原于麻

衣是皆朱子
之所表章也

河圖洛書

彭氏姚小曰今所傳戴九履一之圖乃易乾鑿度九
宮之法自有易以來諸易師未有以此爲河圖者
至本朝劉牧長民方以此爲河圖而又以生數就
成數依五方圖之以爲洛書其言未足深據也又
世所傳關子明洞極經亦言河圖洛書如劉氏說
而兩易之以五方者爲圖九宮者爲書按唐李鼎
祚易集解盡備前世諸儒之說獨無所謂關氏者

至本朝阮逸始偽作洞極經見于后山陳氏談叢
之書則關氏亦不足爲證矣

周易
玩辭

張氏栻曰鄭康成溺于緯書乃云河圖有九篇洛書
有六篇又以河圖爲八卦洛書爲九疇此皆蕪穢

聖經者也

易集
說

林氏至曰易雖曰河出圖洛出書初未嘗曰某爲圖
某爲書也至劉牧出鉤隱圖始以四十五爲河圖
而五十五爲洛書且以爲出于希夷之所傳授始
有戴九履一左三右七二四爲肩六八爲足縱橫

十五總四十有五之說前此未之有也孔穎達曰
龜負洛書先无此事見之緯候之書牧不信聖人
之言而主于緯候之說何邪 又曰緯候之家不

過借河圖洛書之說以神其事至牧反覆言之而

世之論易者多宗其說易之本原愈以不明易禪傳

按林氏出于朱子之門其所爲書乃
能深斥河洛之怪妄可謂卓然者矣

趙氏汝楨曰聖人不過曰河出圖洛出書初未嘗明

著其文漢儒乃指爲畫卦序疇之原劉歆謂洪範
自五行至六極凡六十五字皆洛書本文是洛書

不爲數也。揚雄明一六二七之數，鑿度述一九三七之叙，不聞有圖書之名。是數不爲圖書也。獨孔安國謂神龜負文于背，有數至九，則以洛書爲數矣。後之學者，念圖書之名，習安國之說，而數不可見，遂以楊雄鑿度之數，強合之，而圖書之爲圖書，始斷斷乎爲數矣。十爲河圖，九爲洛書，至劉牧互易其名。朱子雖復其舊，迄今學者所主，猶未一鳴呼河圖洛書。古必有是，倘形制湮泯，正可闕疑。何至依緣髮鬚，以一時臆見而斷千古之疑邪？若夫

圖或爲書書或爲圖其无所取證于聖人則均也

雅易

俞氏琰曰書顧命云天球河圖在東序天球玉也河圖而與天球並列則河圖亦玉也玉之有文者爾洛水至今有白石洛書蓋白石而有文者也

易集說

萬氏斯同曰圖書之亡久矣自漢迄唐或言圖書爲篇冊或言圖卽八卦書卽九疇然並无言親見河圖洛書者與見圖書爲一圈點之物者宋道士陳搏忽出河圖洛書劉牧傳之以四十五點爲河圖

五十五點爲洛書阮逸又反之以五十五點爲圖

四十五點爲書而朱子宗焉

周易傳注

毛氏奇齡曰宋人圖書之僞有確證焉宋濂王禕輩雖非之而未考也陳搏之河圖非卽鄭康成大衍註天一生水于北一段文乎然斷不得爲河圖也以康成註河出圖洛出書不直指曰河圖卽前生成一二之數而曰河圖有九篇洛書有六篇別指爲篇冊知之今之所謂洛書卽易緯乾鑿度太乙下九宮法然亦不得爲洛書也以其篇中詳著取

陰陽卦數以行九宮之說。而復引孔子曰洛書。摘六辟日以建紀知之。是康成註衍數而別釋河圖。與易緯之言宮法而別引洛書二者正相符矣。前同

李氏塏曰。觀大傳天生神物與仰則觀象于天二段。則伏羲作易。无物不察。卽當日真河圖洛書亦僅與天生神物鳥獸之文同爲感觸之一端耳。今不玩易而但觀著龜鳥獸。卽盡易乎。溺于圖書者何。以異是。前同

太極圖

朱氏彝尊曰自漢以來諸儒言易莫有及太極圖者
惟道家者流有上方大洞真元妙經著太極三五
之說唐開元中明皇爲製序而東蜀衛琪注玉清
无極洞仙經衍有无極太極諸圖按陳子昂感遇
詩云太極生天地三元更廢興至精諒斯在三五
誰能徵三元本律曆志陰陽至精之數三五本魏
伯陽參同契是則太極圖說唐之君臣已先知之
矣陳搏居華山曾以无極圖刊諸石爲圖者四位
五行其中自下而上初一日玄牝之門次二曰煉

精化氣煉氣化神次三五行定位曰五氣朝元次
四陰陽配合曰取坎填離最上曰煉神還虛復歸
无極故謂之无極圖乃方士修煉之術爾相傳摶
受之呂崑崙受之鍾離權權得其說于伯陽伯陽
聞其旨于河上公在道家未嘗詡爲千聖不傳之
秘也元公取而轉易之亦爲圖者四位五行其中
自上而下最上曰无極而太極次二陰陽配合曰
陽動陰靜次三五行定位曰五行各一其性次四
曰乾道成男坤道成女最下曰萬物化生更名之

太極圖仍不沒无極之旨由是諸儒推演其說而或以爲自孟子以來所未有焉

曝書亭集

李氏璿曰陳搏又有太極圖傳之周濂溪

見朱震進周易表及

胡五峯通書序

朱子表章以爲學宗毛氏奇齡辯之畧曰

太極圖道家言也其圖取魏伯陽參同契中水火

匡廓三五至精二圖而合爲一

二圖彭曉舊本載之

在隋唐

間有道士作真元品已載之爲太極先天圖卽陳搏之所自始蓋參同本以乾坤水火爲抽填之祕而坎離橫陳乾坤直列搏之所謂以乾南坤北離

左坎右爲先天者而匡廓運轂則以坎離爲車軸之貫輪轉上下乾之南者有時而北坤之北者有

時而南

六十四卦方圖乾北坤南卽此意

而究其要訣則必如鼎

器歌云陰在上陽下奔者故其文有云上德无爲

不可察求言陰在上主靜也下德爲之其用不休

言陽在下主動也宋紹興間朱震進周子太極圖

于高宗猶是上一圈爲陰靜三輪下一圈爲陽動

見朱氏易卦圖上卷如真元品

後朱子爲註雖加修飾而不能掩

其舊云又曰易言動靜有常卽指陰陽也未聞未

生。陰。陽。而。先。有。動。靜。者。也。乾。靜。專。動。直。坤。靜。翕。動。
關。則。陰。陽。俱。有。動。靜。陽。不。必。專。動。陰。不。必。專。靜。也。
且。圖。中。第。二。輪。黑。白。相。間。者。彼。以。爲。坎。離。二。卦。非。
兩。儀。也。五。行。非。四。象。也。又。所。謂。生。八。卦。者。安。在。乎。
恭。按。真。元。品。卽。今。道。藏。中。之。上。方。大。洞。真。元。妙。經。
有。太。極。先。天。之。圖。圖。左。亦。附。會。繫。辭。傳。易。有。太。極。
一。段。又。有。有。物。混。成。先。天。地。生。寂。兮。寥。兮。可。以。爲。
天。下。母。諸。語。周易傳注

五行

李氏塏曰五行生成戰國末卽有其說鄭康成註天一地二一節用之此大謬也夫繫辭傳曰乾大生。坤廣生。皆生也。而成在其中。若論乾知大始。坤作成物。猶可曰天生而地成。今乃曰天地各有生成。是何說乎。且天三生而二成地。三成而二生。何以言之。水木土何以當生于天。而成于地。火金何以當生于地。而成于天。土之生似當先于金木。而反居五。夫土卽地也。豈有地猶无土待生水。火木金後而天乃生之乎。地之成土卽以地成地乎。且天

聖。五。方。生。土。則。二。四。六。八。之。成。物。者。誰。爲。之。乎。此。
聖。經。所。必。无。而。爲。曲。學。之。穿。鑿。附。會。灼。无。疑。也。若。
以。五。行。配。八。卦。更。爲。不。可。毛。氏。奇。齡。曰。以。卦。義。言。
離。爲。火。坎。爲。水。巽。爲。木。矣。然。震。爲。雷。不。爲。木。艮。爲。
山。不。爲。土。兌。爲。澤。不。爲。金。卽。乾。之。爲。金。不。過。與。爲。
玉。並。言。非。專。屬。金。也。以。卦。位。言。則。震。木。兌。金。離。火。
坎。水。似。矣。然。而。坤。不。是。火。艮。不。是。水。有。四。正。而。无。
四。維。卽。曰。坤。艮。屬。土。正。合。五。行。然。何。以。水。火。各。一。
卦。而。金。木。與。土。則。各。有。複。卦。且。何。以。中。央。之。土。反。

无卦位也以卦數言則天一爲坎地二爲離天三爲震地四爲兌而乾巽艮坤則又以六七八九就天地而分屬之似矣然而土爲五十反爲卦數所不取夫參同契云三五至精五行之數全在正五今卦有合五而无正五如金水爲一五木火爲一五皆可兩合而土之正五卦何以反不及也至宋人太極圖專論五行且欲以五行生八卦更无理矣。按金木水火土始見于大禹謨與穀稱六府。洪範著五行而指其潤下等用言流行人間最大。

而適用者猶禹謨之言。府也。考工記謂之五材。春
秋傳曰。天生五材。民並用之。非謂五行。握自帝天
而能生萬物也。至宋人太極圖。乃謂五氣順布。化
生人物。則金木何許。較之人微且頑矣。乃能生人。
有是理乎。今術數家但知宗五行立論。加以生克
之說。此其所以爲小道而不足以言大易也。周易傳注
按漢儒以仁義禮知信爲出于五行。是道生于
器精出于粗。其謬甚矣。至宋人遠過漢儒。而此
等謬說反遵用而闡明之何邪。

互體卦變之屬

王氏弼曰互體不足遂及卦變變又不足推致五行一失其原巧愈彌甚縱復或值而義无所取易畧例

吳氏沆曰離爲龜也損益二卦言龜而互體中並無離艮爲虎也履革二卦言虎而互體中並無艮坎爲豕也姤大畜言豕而互體中並無坎坤爲牛也遯无妄大畜言牛而互體中並無坤

易瑣璣

按義海撮要載宋咸之論亦深斥互體

鄭氏汝諧曰易始于畫畫始于乾坤自乾坤而爲八卦乾坤之變極矣自八卦而爲六十四八卦之變

極矣。八卦皆乾坤所生。六十四卦皆八卦所生。此作易之本旨也。傳易者懼其說之簡易而无以自託于艱深之地。于是爲互體變卦之說。枝蔓其辭。轉相傳致。學者不知其非也。舍道德性命之理而從事于紛紛无補之說。安得見大易之緼哉。翼傳

按東谷此論不獨能斥互體卦變且于作易之本原不待煩言而曲盡其致識解最高持議最確寧易者不可以不沈潛而由繹之也

呂氏陶曰易固有數而八卦之成列不可以數言也。卦固有氣而六爻之適變未可以氣言也。求于八

卦之先而牽于數。故謂坎離生天地。得于六爻之
後。而惑乎氣。故謂卦氣起中孚。此爲異端小說之
所奪。而不能質之于經。故也。義海撮要

晦菴朱氏曰。易之有象。昔之儒求之說卦。而不得。則
遂相與創爲互體變卦五行納甲飛伏之法。參互
以求。而幸其偶合其說。雖詳。然其不可通者。終不
可通。其可通者。又皆傳會穿鑿。而非有自然之勢。
唯其一二之適然而无待于巧說者。爲若可信。然
上无所關於義理之本原。下无所資于人事之訓。

戒則又何必苦心極力以求于此而欲必得之哉

傳義
附錄

按朱子既爲此言。則其于康節之先天固不能
無傳會穿鑿之疑。而河圖洛書等說。皆所謂不
必苦心極力以求
必得之者可知矣。

林氏至曰。今世之言易者。往往喜談象數。或出已智。
或摭先儒之說。牽合傳會。似若可聽。然其巧愈甚。
其失彌遠。不知易之所謂象數者。初不若是其紛
紛也。又曰。大抵論象數者。當以大傳爲正。有如
大傳未嘗言而自成一家。以求陰陽災異之變。如

所謂卦變互體納甲卦氣之屬是皆巫史之學耳
非大易之旨也。易禪傳

李氏心傳曰東周之時以象占言易而亂于支離兩
漢之際以識緯言易而亂于傳會。又曰自周之

衰言易者寢失義文之意而牽合破碎或反資以

爲亂

丙子學
易編

馬氏端臨曰易有聖人之道四變與象居其二焉愚
嘗以爲變之說不一有隨時之變如彖象小象文
言繫辭各自一義是也有逐爻之變如六九七八

陰陽老少是也有逐卦之變如剛柔往來互體飛
伏是也象之說亦不一有卦畫之象陰陽奇耦三
連六斷是也有大象之象天地風雷山澤水火是
也有說卦之象乾爲馬坤爲牛乾爲首坤爲腹之
類是也至簡要者隨時之變也至支離者逐卦之
變也至精微者卦畫之象也至瑣碎者說卦之象
也必研究其簡要精微者而不拘泥其支離瑣碎
者則曰象曰變固无非精義至理之所寄也

周易
玩辭

按隨時之變宜以六爻各自一義言之不得泛
及彖象文言繫辭又陰陽老少乃占者所用之

變不應指爲易爻之
變馬氏說猶未善

焦氏竑曰易卦有變乃九六陰陽二老之交主占者
臨時而言也至于簡帙之上成卦之後豈有某卦
自某卦來之說哉宋儒解彖傳凡有不通處卽以
卦變言紛擾甚矣仙井李舜臣易傳謂舍本卦而
論他卦及某卦自某卦來者皆所不取文山進講
賁卦剛上文柔一節亦不取卦變之說其見卓矣

周易
古本

李氏璫曰按漢焦延壽有一陰一陽自姤復五陰五

陽自夬剝之說宋人因之爲卦變仲氏易因之爲推易大約謂一陽五陰之卦皆自復剝而來一陰五陽之卦皆自姤夬而來二陽四陰之卦皆自臨觀而來二陰四陽之卦皆自遯大壯而來三陰三陽之卦皆自否泰而來朱子以爲非作易本旨乃卦成後有此象其言近是蓋以此爲卜筮觀玩之一助亦可而以諸卦自復剝等來則斷不可乾坤生六子一因重之六十四卦皆具焉有師卦自復卦來訟卦自遯卦來之理邪且六子助天地以生

萬物者也而震巽坎離艮兌反生臨觀等卦則慎
甚矣。以至干寶謂乾之初九自復來乾之九二自
臨來諸卦反生乾坤更顛倒凌亂之極矣而烏可
訓邪。又曰乾坤交而生六子六子合而生萬物
自然之理明載聖經朱漢上易傳六十四卦相生
圖謂乾坤一交而爲姤復再交而爲遯臨三交而
爲否泰以變諸卦是古聖人之作六十四卦也先
有乾坤二六畫卦乃以乾坤交而爲姤復六卦再
以姤復六卦變而爲師比等五十六卦則是乾坤

生姤復六卦非乾坤生震巽六子五十六卦爲姤
復六卦所變非六十四卦爲乾坤六子所重也盡

背聖言矣而可乎

周易傳注

康熙庚子恕谷與子晤于金陵論易謂當主象
余心是其言及見所爲傳註亦頗惑于舊說而
不免支離傳會之失蓋易學之難言也惟先天
河洛之學攷辨甚爲有功故取而附著于篇